

錫山風土竹枝詞



中華民國二十四年十二月

著者 秦頌石

印刷者 無錫文新印刷所

地址 城內崇安寺公園路

吾友頌石能爲詩不佞輒好讀之嘗一日過敝齋向索觀新作君謝無有旋歎曰吾苦少詩料耳不佞則笑應之曰詩料正復不少君盍爲錫山風土竹枝詞乎遂手疏邑中逸聞二三十則與之君忻然持去越數日果製十餘首相示不佞亟慫慂之君喜自此時時有所作其時君方任邑視學輜車周歷十七市鄉殆徧雖村農婦稚君無不慇懃諏訪故所攷訂亦愈稱賅洽今歲春初不佞由彭城南旋君袖寫定稿本走質且告曰吾竹枝詞幸已成帙將授之劄氏子爲元功首勳必不可以無一言不佞固甚樂觀斯集之成者雖微君命其何敢遜謝因舉當日談諧本末質書之如此戊辰臘月日徐彥寬薇生記

君清季肄業京師大學堂出長沙張文達公之門詩格亦於退思軒集爲差近少作尤多風華藻豔惜所著瑞春軒詩詞稿尙謙讓未肯卽錄

行也彥寬再記

序錫山風土竹枝詞竟再跋四集句

徐彥寬

蓉湖又到治春時風物家山繫夢思慚愧天涯飄泊久客窗翦燭看新詩
饒舌豐干話昔年瑯嬛前夢總雲烟星霜十易重回首萬卷輪君續墨綠
君撰茲集實由不佞創議時不佞方任邑圖書館編輯事兼修邑志君時來館
齋談藝甚樂旋不佞有秣陵之游解職去今適十年而君新爲館中延編四次
書目至館纂輯

樂奏鈞天醉未醒劇憐鄉獻太凋零漫將洛社耆英里添築遺山野史亭
君所居中市橋巷舊稱耆英里

勝朝舊事早荒涼司寇風流未散亡彩筆君家幸世守不隨塵劫換滄桑
君祖小峴侍郎嘗撰有詠梁溪雜事詩百首

序

頌碩親家撰錫山風土竹枝詞積十五年之力以得百五十篇意有不盡輔以細注流風舊俗展卷爛然而搜奇采勝往往有邑志之所未備者昔頌碩先君子博學通人焯有文章光緒邑志成以一手世所稱霜傑先生者也吾嘗讀其書而慕之今頌碩嬗其家學託之篇什以備一邑之掌故拾志乘之闕遺可謂文獻世家也於戲邑志放廢不修舊矣而鄉土史地小學定爲教科微君斐然有述作之志於何考信而問業哉弟錢基博

丁年飄泊梓桑之文獻無聞子夜闌珊板蕩之風流欲替輜軒不作稗乘
將湮歲戊午徐子薇生編校邑圖書館過從閒話以吾邑風土竹枝詞相
愆憑並助以故事數十則如風俗物產之特殊神絃社鼓之興替遺聞軼
事之掇拾古蹟名勝地方事業之變易代謝亦附志之一繫以詩積百餘首非云好事聊以自
娛堪哂錙銖集腋無非成事因人比諸草野閒談敢道不賢識小戊辰五
月二十八日頌石記

竹枝詞之草創徐君薇生既督成之且審訂焉戊辰冬末君爲序竟復
題句促付鋟卒卒未果時毘陵吳君啓楓任教邑校亦數袖稿走質君
亦樂觀是作之成者乃不數年間兩君先後歸道山

徐君於庚午閏春
吳君於壬申仲夏

世即今且墓木拱矣撫今思昔不禁黯然乙亥十月頌石再記

錫山風土竹枝詞

無錫秦銘光頌石

鑼鼓喧填歲事更甌香橄欖舊知名新春半月崇安寺士女傾城第一聲
新正半月爲崇安寺節市舊時寺中茶坊在此時期茗盃上例加鮮橄欖游觀
者每稱喫橄欖茶今此風漸替

千門爆竹迸青陽南極星明應壽昌大地春回天錫嘏風光先引老人觴
俗例壽家每於新正半月中擇日祝嘏各家同時並舉閭巷咽闐極一時之盛
金吾初放鬧新年鐙樹元宵不夜天走盡三橋挑菜去月明歸路攢油肩
元宵月夜村俗有走三橋偷菜攢油肩之舉例以走過三橋路旁任拔一菜左
右拂其肩背曰攢油肩殆祓除不祥之意

簫鼓聲中玉漏催紫姑乩畔綺筵開香搓糯粉團新齋佇看龍鐙踏月來
正月十五日俗例食齋菜粉團或齋菜年糕是夜每有龍鐙及各種鐙綵雜以
鼓樂花爆游行街坊諺云正月半龍鐙看是也

完罷官租一歲遷新春樂事灼財先元宵村酒團欒夜田角熒熒祝有年
正月十五夜鄉村有以稻稈等熬火於田之四隅曰灼田角又曰灼田財邑之
南鄉有此風俗

廿四番風到杏花治春春半在村家惠山山下河塘路選勝人來看採茶
俗於二月間鄉村每有採茶鐙之舉曰掉採茶惠山及八士橋等處有之諺云
二月半採茶看是也

回頭有路莫前行此去登高別問程今日南柯同被禊免教湯火陷羣生
上巳日俗有用紅紙條書三月三螞蟻上高山倒粘灶脚牆上謂可避免螞蟻

上灶

青門生氣跌絲絲春到清明三月三記取食瓜詩有詠要憑佳讖兆宜男

三月三日清明節婦女祈子者每於是日食南瓜南男同音以爲生男之兆

清和十日記庚申雨溼天陰不可聞無量孤魂誰卹得殘民猶號太平軍

洪楊之難邑城陷於庚申四月十日殺戮甚慘事平以是日爲難日屆日設壇

卹孤於崇安寺兩邑城隍神素服莅壇街巷間焚鏹相屬至今不革

石榴噴火照鵝湖競渡當年弔左徒一自游龍潛水後招魂再唱楚些無

鵝湖龍舟競渡三十年前一時稱盛其次則醬園浜其船身不用時則沈諸河

自遜清之末已久未舉矣

敬神傳蠟列秋星假託睢陽爲避明功德在人原不滅一鐙千古見民情

七月朔日始邑人每於門前懸鐙一月上有收災降福敬神等字名爲大老爺

鐙相傳張士誠於吳有惠政士誠敗吳民設鐙祀之避明諱因假託張睢陽者
睢陽有廟在錫山麓俗稱大老爺廟 一說係義士張止齋事張士誠將莫天
祐在錫抗明軍明軍將屠城賴義士得全義士四月晦卒里巷於五月朔至晦
戶懸燈以報之嗣改爲睢陽以七月廿五日誕遂於七月懸燈一月 名山小
言云金匱志稱睢陽生日新舊唐書皆無考而張士城據吳至正二十四年七
月廿五日爲壽齊雲樓見姑蘇軼事是七月廿五爲張士誠生日

浮屠七級疊銀缸萬火齊明照十方送盡初秋惜殘夜新詞最憶顧繡塘
七月二十夜缸尖窰舖每疊缸爲塔然鐙其上名爲寶塔鐙顧梁汾先生嘗有
詞詠之

點地星星照夜遲秋光三十已將離善緣好向空王證一瓣心香爇九思
七月二十日地藏菩薩誕日俗以棒香插地及油滯蠟屑就地焚之一家若干

人然燭亦若干對云結來世善緣俗稱燒九思香 一說亦祀張士誠者士誠

小名九思蓋諧音也

霜露名山俎豆香春秋兩戊肅冠裳已無五斗休腰折省卻匆匆拜跪忙
惠山祭祠例於春秋丁祭之翌日縣官派佐貳往祭匆匆輿蓋徧叩各祠光復
後佐貳裁撤官祭亦廢

鬢影衣香步步嬌月明霜坂認三條揚州此夜如同俗閒卻當年廿一橋
元宵中秋月夜婦女每作走三橋之舉往返以經過三橋不走原路爲度

玉輪顧兔廣寒開天上團欒第幾回熱斗當筵秋正半露香佇盼月華來
中秋之夜俗有供月之舉設果筵露香斗於庭當天熱之或更承以高架輒至
宵深謂是夜人靜後每有五色雲氣重重繞月謂之月華見者主貴有八月中
秋夜夜華之諺 香斗形如方升口大底小用香枝編成實以香屑插沈檀等

香焚之

香塍稻熟絢霜朝，秋老田家樂事饒。
日叟黃童齊醉倒，村村鏝吹待青苗。
田家稻熟每祀先農，各鄉有此風俗。
張涇橋近村曰：待青苗。泰伯北上等鄉曰：待秋齋。

煮糜團粉暑寒更，二至推遷再食新。
夏薦來牟冬薦穀，有年相慶慰勞辛。
夏至俗以來麥雜豆類和糯煮粥，冬至以新米作粉團，均取嘗新之義，並以薦先。左傳：食新，註新穀麥也。詩：貽我來牟，來麥也。來麥名適合。

廿三廿四臘將殘，祀灶家家瑪瑙團。
黑白分明應鑒取，所持雖狹迓神歡。
臘月廿三或廿四夜，俗以小紙轎焚化灶牌，曰送灶先祀，以瑪瑙團、糖餅等團，用白粉及赤糖粉各半合之，成團熟則成半白半赤黑。

匆匆四序箭離弦，過去流光劇可憐。
臘鼓聲中催急景，膽除塵浣待新年。

殘臘將終俗有膽簷塵之舉例先檢曆擇日屆時縛稻帚徧拭屋宇謂之膽簷塵寓除舊布新意 膽拭物也禮記桃曰膽之疏云桃多毛拭治去毛令色青滑如膽則膽爲拭物之義虞山席蔚孫飼蠶詞中膽蠶花引之 俗作揮

森然畫戟列村居餞臘家家被飾餘封戶撒灰同守歲一聲爆竹一年除歲除夜村俗有以石灰畫弓矢兵器之屬或書吉語於庭中門前並用石灰界其戶限及廁所等處謂之封門封坑至如通俗之接灶齋并熬火鑪掃庭宇闔戶放爆竹諸事亦兼有之放爆竹在闔戶時曰關門爆元旦啓戶曰開門爆

上清帝誕上元邊九廟冠裳盡肅然東道兩輪城社主五更待漏去朝天正月九日玉帝誕諸神黎明往朝曰朝王會以無錫金匱兩邑廟爲行館先一日下午諸神畢集賽會甚盛兩廟分年輪值備供張 玉皇殿在崇安寺東光復像毀會遂廢 九廟爲祠山殿張睢陽賢聖殿延壽司殿府城隍廟南水仙

西水仙廟錫金兩邑廟

諸神班列東西十廟尊嚴鹵簿齊天惜餘春留祝嘏萬人空巷六街迷
三月廿八日東獄誕諸神朝於錫山之麓東獄行宮俗稱聖帝殿鹵簿之盛罕
有倫比至則息於廡下東西相向班列甚整 九廟見前并東獄爲十廟

燭天庭燎徹宵然治水民懷佐績年似翦春風飛曉雪凍成童狗列神筵
南門外祠山殿俗稱張元庵祀漢張渤相傳爲夏禹時張秉之裔能修先業治
水江浙間開獨山門有功二月初八日誕例然巨燭高可隱人並童狗供神稱
凍狗肉是日前後每有風雪之變謂之張王暴 一說神爲將兵敗遁山中以
犬夜吠被害故祀必以狗云

絕域開邊使節回明珠保赤徧童孩梨莊行雨黃梅節水火年年既濟來
北門外梨花莊賢聖殿祀漢張騫神司痘五月十八日誕有廟市恆在黃梅中

俗稱雨落賢聖殿 曾湘鄉相國以仙露明珠四字題江寧痘神祠扁額 一

說賢聖殿祀炎帝

神燈預慶四時調點綴新秋廿五宵行盡香醴祈福去齊聲宣佛夜如潮
七月廿五日張睢陽誕里巷預於七月初一日起懸燈一月神廟在錫山之麓
廿五之夜村嫗入廟宣佛四鄉往者甚衆

一半秋光三日延青門星斗拱南天願君有壽能延衆誦到菩提便大年
東門外延壽司殿祀南斗八月十八日神誕鄉嫗坐夜官佛者甚衆

首夏清和半月新湖山管領拱西神捨生一例韓彭醢亭長功成總負人
府城隍廟在北門外硯坳橋又名府殿祀漢紀信四月十五日神誕有廟市

故國棠陰民不忘防倭功在繕城隍西神南郭雙祠廟祈報三春七日長
松滋王侯廟在清名橋俗稱南水仙祀明邑侯王其勤惠山亦有公祠公築城

防倭有功三月初七日神誕有廟市 清名橋原名清寧明萬歷中先太清公
太甯公兄弟同建明遺民張夏贊公像載其事 相傳兩公貸人金郤其償償
者亦不受遂以建橋

簫鼓炎天舞柘枝西墩太保水仙祠蓉圩功德千秋在六月中旬紀首時
西水仙墩名太保墩原屬先太保端敏公別墅祀明邑侯劉五緯侯築芙蓉圩
有功六月十一日神誕有廟市俗稱晒煞西水仙

相宅冥冥一炬中奠居應溯鄭家功畏生夏日同吾祖榴火猶餘最後紅
無錫邑廟俗稱老城隍廟相傳在西大街老縣前因被火昇神至三皇街鄭氏
暫駐及廟修復迎神歸擡之不起鄭氏遂捨其居即今廟是五月廿八日神誕
有廟市俗稱熱煞老城隍 先高祖永平公宰江西臨川縣有善政祀名宦亦
五月廿八日生

巍峨新廟近東林黃菊三秋盼半深士女兩河看祝嘏乞天十日不成陰

新邑廟卽金匱城隍廟在東林之陽九月十九日神誕例於十三日縣官牒吏
召羽士設蘸壇廟中三日供張甚盛觀者絡繹屆誕日各廟之神咸往祝嘏大
小兩河士女雲集至光復後廟廢始止

鼎革功成廟貌摧桓桓士氣壯如雷可憐救國擎天手僅把神居試劫灰

光復時新邑廟駐客軍正殿以前悉毀正殿以後列屋僅四壁焉

劫殘誰與好安排手澤回思總愴懷收得桑榆差強意絃歌從此到裙釵

新邑廟毀餘改爲女師範校舍最可惜者嘉會堂上有先大父苴風公撰聯係
陽羨中丞任道鎔所書姑蘇名手唐仁齋鐫製極精雅今已無存聯句云城郭
重新東林化雨常存澤茲竹箭溪山無恙南國遺風猶是栽徧梅花此聯蓋於
光緒十年中法之役修城後撰如其存在至今可用